

*Trotzii*. Proxime sequetur lexicon multis voluminibus comprehensum tanquam encyclopaedia respiciendum, quod in omnium illyricarum dialectorum radicibus et etymologiis investigandis conferendisque immensa eruditione ac labore nunc Viennæ parat vir summi ingenii Samuel Theophilus *Linde* clarissimi comitis *Ossolinskii* bibliothecarius. Demum Slavonia, Croatia, Carniolia, Dalmatia exhibent plures grammaticas, et vocabularia *Bellostöneczii*, *Jambressichii*, *Besedishe* Patris a S. Antonio Patavino dicti, *Dellabellæ*, *Stullii*, et si quæ alia conduntur. Nonnullorum virorum doctrinâ, prudentiâ, conatu, auctoritate, consensu, lege, necnon quorundam potentum Meccenatum auxiliis tota hujus massæ in unum compositio quantocyus fieri posset. Ego aliquos, mihi procul inde degenti cognitos Viros, honoris ac provocationis causa hic palam facio.

Non pauci Russi omni scientiarum artiumque genere excultissimi hucusque floruerunt, qui vel jam editis variis operibus, vel proxime edendis conantur nobilitare patrium sermonem, invehere ac illustrare artes et scientias ita, ut jam nunc temporis Academia Petropolitana cum aliis insignibus comparari queat. Propter abscissam sub præterito regimine litterariam communicationem nonnisi sequentes litterati viri mihi innotuerunt, etsi sciam plures ibidem florere.